

A Falcone e Borsellino omini d'unuri

23 Maggiu - 19 Lughiu 1992

Giucaunu picciriddi
'nte stradi du paisi
'nta l'occhi fami e stiddi
vicinu i prossimi mafiusi

Stissi li stradi acri
stissa puru l'aria
figghi di stissi matri
da stissa malatia

Scola picca e nenti
dispirazioni tanta
u Statu ieni assenti
c'è sulu cu cumanda

L'aria sempri a stissa
a vita troppu amara
cu 'mbrazza la giustizia
cu scegghi la lupara

Li stradi si dividunu
cu cecca cu iè ssicutatu
ma nun si sapi bonu
cu scappa e cu iè braccatu



'Nte stanzi lordi i sangu
u putiri pigghia forma
'nta chiddi i cattì e fangu
a giustizia si deforma

Nn'avi genti bona
puru 'nta ddi palazzi
cchiù sai su i spini e i gghiova
di luci picca sprazzi

Travagghiunu senza stanchizza
fannu sulu u so doveri
'nta ddu mari fattu fezza
unni si proteggiunu i criminali veri

Cu picca cristiani
o ionnu si 'ncumpagnunu
vicini a ddi 'nfami
chi di so metudi già si lagaunu

Tanta fatica e scantu
li mettunu alla sbarra
tanti li cundannunu
ma cu chiddi nun si sgarra

Pi stradi ancora sangu
u putiri i pigghia i mira
mafiusi e lordi i fangu
a so strada ora iè sira

Nun smettunu i travagghiari
sunnù sempri cchiù suli
chi mulini a ventu a luttari
sutta un cielu ora gghinu i nuvuluni

Intantu c'è cu pripara
bombi e telecumandu
pi fari di na strada
lettu i campusantu

O primu su stutaru
caricu i tormenti
ddi corpi li massacraru
'nto svidiri di nenti

Un bucu i pici e sangu
lameri e lamenti
ddu ionnu i suli stancu
fineru li so stenti

Du misi non passaru
sempri a stissa storia
novu lu massacru
vecchia la manu i boria

'Nta ddu buceddu i strada
ancora na mattanza
a puntinu preparata
non 'nta na sula stanza

U Statu si presenta ora e funerali
ci voli faccia tosta
'nta chiesa vicinu e criminali
e bari ci fannu a posta

U populu onestu 'ncazzatu
spinti pugni e sputi
a ddu cetu di 'nfami disonuratu
scrignu di tutti li magagni scunsciuti

Spiranza sippilluta
intra a ddi bari
a vuci i giustizia muta
luntanu i stu mari

Ddi buccchi i fugna i fetu
paroli pi minchiati
'nta ogni ministeru
fannu i scunsulati

Sti figghi di iarusi
nun annu dignità
ancora chi stissi mafiusi
si spattunu a nostra libirtà

Semu sempri cchiù suli
dda supra si nni futtunu
nni strigghiunu comu i muli
cu pedi di villutu poi ni battunu

Muriu la spiranza
sippilluta o cimiteru
ma ancora 'nta cacchi stanza
c'è cu lotta senza velu
Politici e mafiusi
omini fatti i nenti
fangu di sta terra
di tutta quanta genti

Stu populu disgraziatu
tanti anni i spini e storia
si nun fussi 'mbriacatu
stutassi sta lorda boria

Catini e pedi e o coddu
si movi e già si ccupa
pi stu distinu stottu
pari chi non c'è cura

Ciancemu li motti mmazzati
è un nostru dirittu
muremu scunsulati
'nta sta terra vistuta a luttu

Scappari o ristari
nessuna è la rispostu
luttari o cunsulari
scigghiemuni la posta

Mostaccio Domenico